

四庫全書

子部

欽定四庫全書

子部

神農本草經疏卷十四

詳校官太醫院恩種臣孔毓秀

編修臣倉聖脈覆勘

總校官進士臣繆琪

校對官中書臣吳俊

謄錄監生臣宋大樽

欽定四庫全書

神農本草經疏卷十四

明 繆希雍 撰

木部下品

總九十九種今疏其要者二十九種

巴豆

蜀椒

皂莢子刺附

訶黎勒

棟實根附

椿木葉樗木附

郁李仁

無食子

黃藥根

雷丸

蘇方木

胡椒

南燭枝葉

橡實

石南

益智子

紫荊木

紫真檀

烏柏木

杉材

接骨木

樺木皮

木鼈子

蓄木
鼈附

鈎藤

赤檉木

水楊葉

柞木皮

櫻櫚

木槿

巴豆味辛溫生溫熟寒有大毒主傷寒溫瘧寒熱破癥

癥結聚堅積留飲痰癖大腹水脹蕩滌五藏六腑開通
閉塞利水穀道去惡肉除鬼毒蠱疰邪物殺蟲魚療女
子月閉爛胎金瘡膿血不利丈夫陰殺班猫毒可鍊餌
之益血脈令人色好變化與鬼神通

疏○巴豆生於盛夏六陽之令而成於秋金之月故
味辛氣溫得火烈剛猛之氣故其性有大毒別錄言
生溫熟寒恐熟亦不甚寒氣薄味厚降也陽中陰也
入手足陽明經其主破癥瘕結聚堅積留飲痰癖大

腹水腫鬼毒蠱症邪物女人月閉者皆腸胃所治之位中有實邪留滯致生諸病故腸胃有病則五臟六腑閉塞不通此藥稟火性之急速兼辛溫之走散入腸胃而能蕩滌一切有形積滯之物則閉塞開水穀道利月事通而鬼毒蠱症邪物悉為之驅逐矣溫瘧者亦暑溼之氣入於腸胃也腸胃既清則溫瘧自止火能灼物故主爛胎及去惡肉性熱有大毒則必有損於陰故不利丈夫陰本經又主傷寒寒熱及別錄

煉餌之法悉非所宜豈有辛熱大毒之物而能治傷寒寒熱及益血脈好顏色之理哉

主治參互

同白礬枯過去巴豆單用礬研細吹入喉中流出熱毒涎喉即寬治急喉痺如神 一味炒烟盡存性研

膏治癰疽潰後腐肉不落傳上即拔毒去瘀生新

外臺秘要飛尸鬼擊中惡心痛腹脹大便不通走馬湯用巴豆二枚去皮心熬黃杏仁二枚以綿包椎碎

熱湯一合捻取白汁服之當下而愈量老少用之

瑣碎錄天絲入咽凡露地飲食有飛絲入上食之令人咽喉生瘡急以白礬巴豆燒灰吹入即愈 經驗

方耳卒聾閉巴豆一粒綿裹針刺孔通氣塞之取效

普濟方一切惡瘡有蟲者巴豆三十粒麻油煎黑去

豆以油調硫黃輕粉末頻塗取效 仲景三物白湯

治傷寒懊懺滿悶身無熱者為寒結胸用桔梗三分

巴豆一分去皮心熬黑貝母三分二味為末內巴豆

白中杵之以白湯和服強人半錢弱者減之病在膈
上必吐在膈下必利不利進熱粥一杯利過不止進
冷粥一杯

簡誤

元素曰巴豆乃斬關奪門之將不可輕用世以之治
酒病膈氣以其辛熱能開通腸胃鬱結耳第鬱結雖
開而血液隨亡真陰虧損從正曰傷寒風溫小兒痘
瘡婦人產後用之下膈不死亦危奈何庸人畏大黃

而不畏巴豆以其性熱而劑小耳豈知蠟匱之猶能
下後使人津液枯竭胸熱口燥耗却天真留毒不去
他病轉生觀二公之言則巴豆之為害昭昭矣然而
更有未盡者巴豆稟火烈之氣沾人肌肉無有不灼
爛者試以少許輕擦完好之膚須臾即發出一泡況
腸胃柔脆之質下咽則徐徐而走且無論下後耗損
真陰而腑臟被其熏灼能免無潰爛之患耶凡一槩
湯散丸劑切勿輕投即不得已急證欲借其開通道

路之力亦須炒熟壓令油極淨入分許即止不得多用

蜀椒味辛溫大熱有毒主邪氣欬逆溫中逐骨節皮膚死肌寒濕痺痛下氣除六腑寒冷傷寒溫瘡大風汗不出心腹留飲宿食腸澼下痢洩精女子字乳餘疾散風邪癥結水腫黃疸鬼疰蠱毒殺蟲魚毒久服頭不白輕身增年開腠理通血脈堅齒髮調關節耐寒暑可作膏藥多食令人乏氣口閉者殺人

疏○蜀椒稟火金之氣得南方之陽受西方之陰本
經味辛氣溫別錄大熱有毒氣味俱厚陽也入手足
太陰兼入手厥陰經其主邪氣欬逆皮膚死肌寒濕
痺痛心腹留飲宿食腸澼下痢黃疸水腫者皆脾肺
二經受病肺出氣主皮毛脾運化主肌肉肺虛則外
邪客之為欬逆上氣脾虛則不能運化水穀為留飲
宿食腸澼下利水腫黃疸二經俱受風寒濕邪則為
痛痺或成死肌或致傷寒溫瘧辛溫能發汗開腠理

則外邪從皮膚而出辛溫能煖腸胃散結滯則六腑
之寒冷除腸胃得溫則中焦治而留飲宿食腸澀下
利水腫黃疸諸證悉愈矣其主女子字乳餘疾者亦
指風寒外侵生冷內停而言洩精癥結由下焦虛寒
所致此藥能入右腎命門補相火元陽則精自固而
結癥消矣療鬼疰蠱毒殺蟲魚毒者以其得陽氣之
正能破一切幽暗陰毒之物也外邪散則關節調內
病除則血脈通佐補陰涼血之藥則頭不白齒髮堅

耐寒暑輕身增年所自來矣

主治參互

同女貞子牛膝地黃何首烏旱蓮草枸杞子沒食子
桑椹子黃蘗人參南燭子能烏鬚黑髮悅色駐顏

空心單服能收輕粉水銀毒臟椒紅丸治元臟傷憊
目暗耳聾服此百日覺身輕少睡足有力是其効也
服及三年心智爽悟目明倍常面色紅悅鬚髮光黑
用蜀椒去目及閉口者炒出汗曝乾搗取紅一斤以

生地黄搗自然汁入砂器中煎至一升候稀稠得所
和椒末九梧子大每空心煖酒下三十九合藥時勿
令婦人雞犬見 孫真人方心腹冷痛以布裹椒安
痛處用熨斗熨令椒出汗即止 普濟方餐泄不化
及久利小椒一兩炒蒼朮二兩土炒研末醋糊丸梧
子大每五十九米飲下 經驗方囊瘡痛痒紅椒七
粒葱頭七箇煎水洗之 大全良方寒濕脚氣川椒
二三升疎布囊盛之日以踏脚 入仲景烏梅丸治

虻厥 宗奭方治盜汗將椒目微炒研細用半錢以
生猪上唇煎湯一合睡時調服無不効 甄權方治
腎虛耳中如風水鳴或如鐘磬之聲卒暴聾者用椒
目巴豆菖蒲同研細以松脂黃蠟溶和為挺納耳中
抽之一日一易神驗 千金方水氣腫滿椒目炒搗
細每酒服方寸七

簡誤

椒稟純陽之氣乃除寒溼散風邪溫脾胃煖命門之

聖藥然而肺胃素有火熱或欬嗽生痰或嘈雜醋心
嘔吐酸水或大腸積熱下血咸不宜用凡泄瀉由於
火熱暴注而非積寒虛冷者忌之陰痿脚弱由於精
血耗竭而非命門火衰虛寒所致者不宜入下焦藥
用欬逆非風寒外邪壅塞者不宜用字乳餘疾由於
本氣自病者不宜用水腫黃疸因于脾虛而無風溼
邪氣者不宜用一切陰虛陽盛火熱上衝頭目腫痛
齒浮口瘡衄血耳聾咽痛舌赤消渴肺痿咳嗽咯血

吐血等證法所咸忌

皂莢味辛鹹溫有小毒主風痺死肌邪氣風頭淚出利
九竅殺精物療腹脹滿消穀除欬嗽囊結婦人胞不落
明目益精可為沐藥

疏○皂莢稟木氣而兼火金之性故味辛微鹹氣溫
有小毒氣味俱厚浮而散陽也入足厥陰手太陰陽
明經厥陰為風木之臟其主風痺死肌頭風淚出者
皆厥陰風木為病得金氣之厚者能勝木稟辛散之

性者能利竅木氣平關竅利則風邪散諸證除也關
竅既利則神明自通精物邪氣安得不去哉又厥陰
之脈循陰器而絡於肝厥陰客寒為囊結辛溫散厥
陰之寒則囊結解矣肺受風寒所迫為欬嗽入肺散
邪則欬嗽止矣鹹能軟堅溫主通行辛能開竅橫走
故又主腹脹滿消穀及婦人胞不落也宣壅導滯之
性而云益精明目無是理矣

子氣味與皂莢同炒春去赤皮以水浸軟煮熟糖漬

食之疎導五臟風熱壅滯及治大腸虛秘瘰癧惡瘡
腫毒

刺功用與艾同第其銳利能直達瘡所為癰疽妬乳
丁腫未潰之神藥蘇頌以米醋熬嫩刺作煎塗癰瘡
有奇効又治癘風惡瘡胎衣不下殺蟲凡癰疽已潰
不宜服孕婦亦忌之

主治參互

同真珠象牙末牛黃冰片白殭蠶滴乳石土茯苓治

疰疔神効 孫用和稀涎散治中風昏昏如醉形體不收或倒或不倒或口角流涎斯須不治便成大病此證風涎潮於上胸痺不通急宜吐之用大皂莢肥實不疰者四挺去黑皮白礬明者一兩為末每用半錢重者三字溫水調灌不大嘔吐只是微微稀冷涎或出一升二升當待醒醒乃用藥調治不可便大吐之恐過劑傷人累効不能盡述 聖惠方胸中痰結皂莢三十挺去皮切水五升浸一夜接取汁慢熬至

可丸如梧子大每食後鹽漿水下十九 又釣痰膏

用半夏醋煮過以皂角膏和勻入明礬少許以柿餅

搗膏丸如彈子大噙之 千金方二便關格皂莢燒

研粥飲下三錢立通宣明方鐵脚丸同 千金方躄

鼻不通皂角末吹之 十全方風蟲牙痛猪牙皂莢

角食鹽等分為末日搯之 袖珍方便毒腫痛猪牙

皂角七片煨黃去皮弦出火毒為末空心溫酒服五

錢婦人妬乳同 直指方便毒癰疽皂角一條醋熬

膏傳之屢効 儒門事親便癱初起皂角子七枚研

末水服効 阮氏經驗方年久瘰癧用不蛀皂角子

一百粒米醋一升蓬砂二錢同煮乾炒令酥看癰子

多少如一箇服一粒十箇服十粒細嚼米湯下酒浸

煮服亦可一云虛人不可用蓬砂 同蟬蛻白殭蠶

杏仁芭蕉根白毛藤土茯苓獨核肥皂仁白蘚皮連

翹薏苡仁草薺漢防己治下疳廣瘡神効 同連翹

白芷甘菊紫花地丁白及金銀花甘草鼠粘子茜草

地榆治下部癰疽腫毒 神仙傳崔言患大風惡疾
雙目昏盲眉髮自落鼻梁崩倒勢不可救遇異人傳
方用皂角刺三斤燒灰蒸一時久日乾為末食後濃
煎大黃湯調一七飲之一旬眉髮再生肌潤目明

簡誤

皂莢利九竅疎導腸胃壅滯洗垢膩豁痰涎散風邪
暴病氣實者用之殊効第似中風證由於陰虛火炎
煎熬津液結而為痰熱極生風以致猝然仆躓世人

多以稀涎散吐之損其不足竭其津液津液愈耗則
經絡無以榮養為拘攣偏廢之證矣法所最忌也孕
婦忌服

訶黎勒味苦溫無毒主冷氣心腹脹滿下食

疏○訶黎勒其味苦瀼其氣溫而無毒苦所以洩瀼
所以收溫所以通惟絞故能主冷氣心腹脹滿惟溫
故能下食甄權用以止水道蕭炳用以止陽癖久洩
蘇頌用以療腸風瀉血帶下朱震亨用以實大腸無

非苦瀼收斂治標之功也

主治參互

得人參治肺虛受寒喘嗽 得橘皮砂仁主冷氣入

內心腹脹滿及因寒食不下 得益智止氣虛寒小

水不禁 佐樗根白皮止腸澼瀉血 佐白朮蓮實

止久洩因於虛寒 同蛇牀子五味子山茱萸杜仲續

斷止虛寒帶下 同人參肉苁蓉則實大腸

簡誤

訶子性溫而味澹澹主斂不主散故咳嗽因於肺有
實熱泄瀉因於濕熱所致氣喘因於火逆衝上帶下
因於虛熱而不因於虛寒及腸澼初發濕熱正盛小
便不禁因於腎家虛火法並忌之至於滯下必本濕
熱喘嗽實由肺火用之立致殺人不可不深戒也東
垣謂苦重瀉氣酸輕不能補肺故嗽藥中不用亦此
意耳

棟實味苦寒有小毒主溫疾傷寒大熱煩狂殺三蟲疥

瘍利小便水道根微寒療虻蟲利大腸

即金鈴子

疏○棟實稟天之陰氣得地之苦味故其味苦氣寒極苦而寒故其性有小毒氣薄味厚陰也降也入足陽明手足太陰經經曰冬傷於寒春必病溫其主溫疾傷寒大熱煩狂者總因寒邪鬱久至春變為溫病邪在陽明也苦寒能散陽明之邪熱則諸證自除膀胱為州都之官小腸為受盛之官二經熱結則小便不利此藥味苦氣寒走二經而導熱結則水道利矣

濕熱鬱積則内生諸蟲濕熱浸淫則外為疥瘍得大寒極苦之物則濕熱散故能療諸蟲及疥瘍也根氣味相同故亦主殺蟲利大腸耳

主治參互

同牛膝木瓜橘核荔枝核杜仲巴戟天烏穠樹子懷香治腎虛疝氣 澹寮方棟實丸治癩疝腫痛或鈎腎偏墜痛不可忍用川棟子肉五兩分作五分一分用破故紙二錢炒黃一分用小茴香三錢食鹽半錢

同炒一分用班蝥七枚去頭足同炒一分用萊菔子
一錢同炒一分用牽牛子三錢同炒炒完揀去食鹽
萊菔子牽牛班蝥只留故紙茴香同研為末以酒打
麵糊丸梧子大每五十九空心酒下 根同白蕪荑
檳榔鶴蝨黃連牽牛雷丸使君子錫灰烏梅蘆會殺
腸胃一切蟲 集簡方治小兒虵蟲棟根皮同雞卵
煮熟空心服之次日蟲下

簡誤

脾胃虛寒者不宜用

椿木葉味苦有毒主洗瘡疥風疽皮主甘蜜樗木根葉

尤良

雷公云凡使椿根不近西頭者為上採出并生葱蒸半日判細以袋盛掛屋南陰乾用

疏○椿稟地中之陰氣以生本經味苦有毒甄權言

微熱震亨言涼而燥然考其用必是微寒苦燥之藥

入手足陽明經本經主甘蜜及洗疥瘡風疽藏器去

口鼻疔蟲疥蠶者因腸胃有濕熱故現是證苦涼而

燥所以外治皆得也藏器又主殺虬蟲蠱毒下血及

赤白久痢日華子主腸風瀉血蕭炳云得地榆主痢
痢孟詵云止女子血崩及產後血不止赤帶皆取其
苦能燥濕寒能除熱瀆能收斂之功耳採得去粗皮

蜜炙用

樗功用
相同

主治參互

存仁方下血經年樗根白皮三錢水一盞煎七分入
酒半盞服 外臺秘要小兒疳痢困重者用樗根白
皮搗粉以水和棗作大饅餛子日曬少時又搗如此

三遍以水煑熟空腹吞七枚重者不過七服愈 子
母秘錄小兒疳疾椿根白皮日乾二兩為末以粟米
淘淨研濃汁和丸梧子大十歲兒三四丸米飲下量
大小加減仍以一丸納竹筩中吹入鼻內三度良

經驗方下利清血腹中刺痛椿根白皮洗刮曬研醋
糊丸梧子大空心米飲下三四十丸 婦人良方產
後腸脫不能收拾者椿根取皮焙乾一握水五升連
根葱五莖漢椒一撮同煎至三升去渣傾盆內乘熱

熏洗冷則再熱一服可作五次用洗後睡少時忌鹽
酢醬麵發風毒物及用心勞力等事 丹溪方女人

白帶椿根白皮滑石等分為末粥丸梧子大空腹白
湯下一百丸 寇宗奭云洛陽一女子年四十六七
眈飲無度多食魚蟹畜毒在臟日夜二三十瀉大便
與膿血雜下大腸連肛門痛不堪忍醫以止血痢藥
不効又以腸風藥則益甚蓋腸風則有血無膿如此
半年氣血漸弱食減肌瘦服熱藥則腹愈痛血愈下

服冷藥則注泄食減服溫平藥則病不知如此期年
垂命待盡或人教服人參散一服知二服減三服膿
血皆定遂常服之而愈其方治大腸風虛飲酒過度
挾熱下痢膿血痛甚多日不瘥用檇根白皮一兩人
參一兩為末每服二錢空心米飲調服忌油膩濕麵
青菜菓子甜物雞豬魚羊蒜薤等

簡誤

脾胃虛寒者不可用崩帶屬腎家真陰虛者亦忌之

以其徒燥故也凡滯下積氣未盡者亦不宜遽用不
入湯煎

郁李仁味酸平無毒主大腹水腫面目四肢浮腫利小
便水道

疏○郁李仁得木氣而兼金化本經味酸氣平無毒
元素言辛苦性潤而降下陰也入足太陰手陽明太
陽經其主大腹水腫面目四肢浮腫者經曰諸濕腫
滿皆屬脾土又曰諸腹脹大皆屬於熱脾虛而溼熱

客之則小腸不利水氣泛溢於面目四肢辛苦能潤
熱結降下善導癰閉小便利則水氣悉從之而出矣
甄權主腸中結氣闕格不通日華子云泄五臟膀胱
結痛宣腰膝冷膿消宿食下氣元素云破血潤燥李
杲云專治大腸氣滯燥瀉不通均得之矣

主治參互

同當歸地黃麻仁麥門冬桃仁生蜜肉蓯蓉治大便
燥結不通甚者加大黃 楊氏產乳腫滿氣急不得

臥用郁李仁一大合搗和麵作餅喫入口即大便通
泄氣便愈

簡誤

郁李仁性專降下善導大腸燥結利周身水氣然而
下後多令人津液虧損燥結愈甚乃治標救急之藥
津液不足者慎勿輕用

無食子味苦溫無毒主赤白痢腸滑生肌肉

疏○無食子稟春生之氣兼得西北金水之性故味

苦氣溫無毒金主斂肅大腸屬金以類相從故主赤
白痢腸滑春為發生之令溫能和脾胃養腠理故主
生肌肉水為潤下色黑而象腎故李珣以之益血生
精和氣安神烏髭髮治陰痿諸證也得溫暖之氣復
兼收斂之性故為固滯精氣之要藥

雷公云凡使勿
犯銅鐵并被火

鷲者用顆小無枚米者炒用漿水於砂
盆中研令盡焙乾再研如烏犀

主治參互

同蓮鬚女貞子枸杞子地黃南燭子何首烏黃精旱

蓮草朮人參為烏鬚髮之勝藥 同覆盆子牡蠣枸

杞子五味子車前子地黃蓮鬚龍骨鹿茸沙苑蒺藜

魚膠膠砂仁黃蘗能補益精氣治一切夢遺洩精

仲景方治陰汗用無食子燒灰先以湯浴了布裹灰

撲之甚良 宮氣方小兒久痢沒食子二箇熬黃研

末作餛飩食之 聖濟總錄牙齒疼痛綿裹無食子

末一錢咬之涎出吐去 聖惠方大小口瘡沒食子

炮三分甘草一分研末摻之月內小兒生者少許置

乳上吮之入口即啼不過三次 奇効方足趾肉刺
無食子三枚肥皂莢一挺燒存性為末醋和傅之立
効

簡誤

赤白痢由於濕熱鬱於腸胃兼積滯多者不宜用

黃藥根味苦平無毒主諸惡腫瘡癩喉痺蛇犬咬毒研
水服之亦含亦塗

疏○黃藥根得土中至陰之氣以生故其色黃味苦

氣平無毒平即兼涼曰華子加涼是矣氣薄味厚降
多升少陰也入手少陰足厥陰經諸惡腫瘡癭皆榮
氣不從逆於肉裏所致蓋榮主血肝心又主血藏血
之臟二經得苦涼之氣則血熱解榮氣和標證不求
其止而止矣經曰一陰一陽結為喉痺一陰者少陰
君火也一陽者少陽相火也解少陰之熱相火自不
妄動而喉痺瘳矣蛇犬咬毒亦血分受熱毒所傷故
也苦寒能涼血得土氣之厚者又能解百毒也日華

子以之療馬病蓋馬性多熱亦取其苦寒除熱之義耳

主治參互

同忍冬藤夏枯草白及白斂紫花地丁甘菊茜草連翹牛旁子白芷貝母白藥子之屬治一切疔腫癰疽本經并載赤藥俗名紅藥子子嘗得一方以之為君每四兩加白及白斂各一兩乳香沒藥各五錢丹砂雄黃各三錢麝香龍腦香各一錢為細末量瘡大小

蜜調敷瘡四圍中留大孔以綿紙護之時時以米醋
潤之其痛即減亦復易潰易收治一切發背癰疽俱
神効陰毒尤要如無赤藥子以黃藥子代之 孫思
邈千金月令方療忽生癭疾以萬州黃藥子半斤須
緊重者為上如輕虛即是他州者力慢須用加倍取
無灰酒一斗投藥入中固濟瓶口以糠火燒一伏時
待酒冷乃開時時飲一杯不令絕酒氣經三五日後
常把鏡自照覺消即停飲不爾便令人項細也 聖

惠方治吐血不止黃藥子一兩水煎服 簡要濟衆
方治鼻衄不止黃藥子為末每服二錢煎薄膠湯下
良久以新水調麵一匙頭服之 禹講師經驗方產
後血暈惡物沖心四肢冰冷唇青腹脹昏迷紅藥子
一兩頭紅花二錢水二盞婦人油釵二隻同煎一盞
服大小便俱利血自下也

簡誤

癰疽已潰不宜服癰疽發時不焮腫不渴色淡脾胃

作泄者此為陰證當以內補為急解毒次之藥子之類宜少服止可外敷

雷丸味苦鹹寒微寒有小毒主殺三蟲逐毒氣胃中熱利丈夫不利女子作摩膏除小兒百病逐邪氣惡風汗出除皮中熱結積蠱毒白蟲寸白自出不止久服令人陰痿

疏○雷丸稟竹之餘氣兼得地中陰水之氣以生本經味苦氣寒別錄加鹹有小毒黃帝岐伯桐君扁鵲

云甘詳其所主應是苦鹹為勝氣薄味厚陰也降也
入手足陽明經其主殺三蟲白蟲寸白自出者腸胃
濕熱甚也逐毒氣胃中熱邪氣惡風汗出皮中熱結
積者腸胃邪熱盛也苦寒能除二經濕熱邪氣則上
來諸證自除作摩膏治小兒百病者以小兒好食甘
肥腸胃類多濕熱蟲積苦能殺蟲除濕鹹寒能清熱
消積故主之也凡蠱毒必熱必辛苦寒能除辛熱故
又主解蠱毒也利丈夫不利女子者蓋以男子屬陽

得陰而生故喜陰寒之味女子屬陰得陽而長故不利陰寒之物也別錄又云久服令人陰痿正見其過於苦寒偏至之氣能令陽道痿也

主治參互

同燕萁使君子蘆會五穀蟲胡黃連青黛治小兒疳
虯有神 同檳榔鶴蝨棟根貫衆牽牛錫灰薏苡根
殺腸胃一切蟲 經驗方下寸白蟲雷丸水浸去皮
切焙為末五更初食炙肉少許以稀粥飲服一錢七

須上半月服蟲乃下 除殺蟲外他用甚稀故不著
簡誤惟赤色者能殺人用時細擇去之

蘇方木味甘鹹平無毒主破血產後血脹悶欲死者水
煮苦酒煮五兩取濃汁服之効

疏○蘇方木稟水土之氣以生故其味甘鹹氣平無
毒好古加辛降多於升陽中陰也入足厥陰兼入手
少陰足陽明經凡積血與夫產後血脹悶欲死無非
心肝二經為病此藥鹹主入血辛能走散敗濁瘀積

之血行則二經清寧而諸證自愈日華子主婦人血
氣心腹痛月候不調及蓐勞排膿止痛消癰腫撲損
瘀血女人失音血噤海藥主虛勞血癖氣壅滯產後
惡露不盡心腹攪痛及經絡不通悉取其入血行血
辛鹹消散亦兼有軟堅潤下之功故能祛一切凝滯
留結之血婦人產後尤為所須耳

主治參互

同澤蘭川芎麥門冬生地黃蒲黃人參童便益母草

牛膝黑豆荊芥穗治產後血暈有神 同山查延胡
索牡丹皮澤蘭當歸五靈脂赤芍藥紅花治產後兒
枕作痛加入乳香沒藥治產後血癖不消因寒而得
者加炒黑乾薑桂各少許 同延胡索牡丹皮牛膝
當歸地黃芍藥續斷治婦人月候不調煎濃汁加入
乳香沒藥血竭自然銅麝蟲麻皮灰黃荊子等末量
病輕重調服四五錢治跌撲損傷如神 胡氏方產
後氣喘面黑欲死乃血入肺也用蘇木二兩水二碗

煮一碗入人參末五錢服隨時加減神効不可言名
參蘇飲

簡誤

產後惡露已盡由血虛腹痛者不宜用

胡椒味辛大溫無毒主下氣溫中去痰除臟腑中風冷
疏○胡椒稟天地純陽之氣以生故其味辛氣大溫
性雖無毒然辛溫太甚過服未免有害氣味俱厚陽
中之陽也入手足陽明經其主下氣溫中去痰除臟

腑中風冷者總因腸胃為寒冷所乘以致臟腑不調
痰氣逆上辛溫煖腸胃而散風冷則痰氣降臟腑和
諸證悉瘳矣

主治參互

食療治心腹冷痛胡椒三七枚清酒吞之 衛生易
簡方夏月冷瀉及霍亂用胡椒碾細飯丸梧子大每
米飲下四十丸

簡誤

胡椒辛溫大熱純陽之藥也凡胃冷嘔逆宿食不消
或霍亂氣逆心腹冷痛或大腸虛寒完穀不化或寒
痰冷積四體如冰煎殺一切魚肉鼈草等毒誠為要
品然而血分有熱與夫陰虛發熱咳嗽吐血咽乾口
渴熱氣暴衝目昏口臭齒浮鼻衄腸風臟毒痔漏洩
游等證切勿輕餌誤服之能令諸病即時作劇慎之
慎之

南燭枝葉味苦平無毒止泄除睡強筋益氣久服輕身

長年令人不饑變白去老取莖葉搗碎漬汁浸粳米九
浸九蒸九暴米粒緊小正黑如墜珠袋盛之可適遠方
日進一合不饑益顏色堅筋骨能行取汁炊飯名烏飯
亦名烏草亦名牛筋言食之健如牛筋也

疏○南燭稟春升之氣以生本經言其味苦氣平性
無毒然嘗其味亦多帶微瀼其氣平者平即涼也入
心脾腎三經之藥十劑云瀼可去脫非其味帶瀼則
不能止泄非其氣本涼則不能變白髮者血之餘也

顏色者血之華也血熱則鬚髮早白而顏枯槁脾弱則困倦嗜臥而氣力不長腎虛則筋骨軟弱而行步不前入心涼血入脾益氣入腎添精其云輕身長年令人不饑者非虛語矣凡變白之藥多是氣味苦寒有妨脾胃惟南燭氣味和平兼能益脾為修真家所須子味甘酸其功效尤勝枝葉真變白駐顏輕身却老之良藥也牧童食之輒止饑渴亦一驗矣

主治參互

孫思邈千金月令方南燭煎益髭髮及容顏兼補煖
三月三日采葉并葢子入大淨瓶中以童子小便浸
滿瓶固濟其口置閒處經一周年取開每用一匙溫
酒調服極有效驗 同旱蓮草沒食子地黃桑椹枸
杞山茱萸何首烏白蒺藜為烏鬚髮之聖藥 氣味
和平性復無毒除變白外無他用故不著簡誤
椽實味苦微溫無毒主下痢厚腸胃肥健人其殼為散
及煮汁服亦主痢並堪染用

疏○椽實感天地微陽之氣兼得秋時收斂之性故其味苦氣微溫性無毒氣薄味厚陽中陰也入手足陽明足太陰少陰經夫脾胃為五臟根本一身之最要喜溫暖而惡寒濕寒濕則違其性故宜急食苦以燥之此藥味苦能除其所惡氣溫能遂其所喜故主厚腸胃肥健人也得收斂之性故又主下痢及日華子瀉腸止瀉諸治兼能瀉精煮食復能止饑禦敵歲穀氣味與實相同而瀉則過於實故亦主下痢并

堪染皂也

主治參互

聖惠方水穀下痢日夜百餘行者椽實二兩楮葉炙
一兩為末每服一錢食前烏梅湯調下 直指方下
痢脫肛椽斗子燒存性研末猪脂和傅

簡誤

濕熱作痢者不宜用

石南味辛苦平有毒主養腎氣內傷陰衰利筋骨皮毛

療脚弱五藏邪氣除熱女子不可久服令思男

疏○石南得火金之氣故其味辛苦氣平有毒然觀
其用當是金勝火微其性應云有小毒可升可降陰
中陽也入足厥陰足少陰經少陰屬水得金氣之厚
者能生水故主養腎氣又腎為陰中之陰肝為陰中
之陽二經俱在下而主筋骨二經得所養則內傷陰
衰自起筋骨皮毛自利而脚弱自健也濕熱之邪留
滯五臟則筋骨皮毛氣血皆為之病矣邪熱散則諸

病自瘳女子久服思男者以其補腎氣助陽火耳

主治參互

同巴戟天肉蓯蓉瑣陽鹿茸枸杞子山茱萸治腎經
虛寒精滑精冷 同白蒺藜桑葉何首烏淫羊藿巴
戟天五加皮兔絲子威靈仙虎骨治肝腎為風寒溼
所乘以致痺弱不能行動

簡誤

腎虛而陽道數舉者不宜用脚弱由於肝腎虛而不

由於風寒濕客下部者不宜用

益智子味辛溫無毒主遺精虛漏小便餘瀝益氣安神
補不足安三焦調諸氣夜多小便者取二十四枚碎入

鹽同煎服有奇驗

疏○益智子仁得火土金之氣故其味辛其氣溫其
性無毒入足太陰足少陰經惟辛故所以散結惟溫
故所以通行其氣芳香故主入脾其稟火土與金故
燥而收斂以其斂攝故治遺精虛漏及小便餘瀝此

皆腎氣不固之證也腎主納氣虛則不能納矣又主
五液涎乃脾之所統脾腎氣虛二臟失職是腎不能
納脾不能攝故主氣逆上浮涎穢泛濫而上溢也斂
攝脾腎之氣則逆氣歸元涎穢下行宜東垣用以治
客寒犯胃和中益氣及人多唾王好古謂益智本脾
家藥主君相二火故用以益脾胃理元氣補腎虛滑
瀝劉河間又謂益智辛熱能開發鬱結使氣宣通皆
以其香可入脾開鬱辛能散結復能潤下於開通結

滯之中復有收斂之義故也

主治參互

益智在集香丸則入肺在四君子湯則入脾在大鳳
髓丹則入腎當於補藥中兼用不宜多服 佐人參

茯苓半夏橘皮車前子則攝涎穢立効 同藿香蘇

子橘皮枇杷葉木瓜止逆氣上壅 同五味子山茱

萸炒鹽人參治小便頻數淋瀝 同人參乾薑橘皮

藿香治因寒犯胃作嘔吐

簡誤

益智乃脾腎二經之藥其用專在脾所以亦能入腎者辛以潤之之故也然其氣芳香性本溫熱證屬燥熱病人有火者皆當忌之故凡嘔吐由於熱而不因於寒氣逆由於怒而不由於虛小便餘瀝由於水涸精虧內熱而不由於腎氣虛寒泄瀉由於濕火暴注而不由於氣虛腸滑法並忌之

紫荊木味苦平無毒主破宿血下五淋濃煮服之

疏○紫荊木皮內稟天地清寒之性外感南方初陽之氣故其味苦氣平花木色皆紫藏器言寒無毒入足厥陰經血分寒勝熱苦泄結紫入榮故能活血破血消腫毒下五淋也花梗氣味功用並同

主治參互

仙傳外科發背初生一切癰疽皆治單用紫荊皮為末酒調蘊住自然撮小不開內服柞水飲子乃救貧良劑也并可內服 楊清叟仙傳方沖和膏治一切

癰疽發背流注諸腫毒用紫荊皮三兩炒獨活炒三兩赤芍藥炒二兩生白朮一兩木蠟炒一兩為末用葱湯調熱敷血得熱則行葱能散氣也瘡不甚熱者酒調之痛甚者加乳香 除癰毒外他用甚稀故無簡誤

紫真檀味鹹微寒主惡毒風毒

疏○紫真檀稟水氣以生故其味鹹氣微寒性應無毒氣味俱厚陽中陰也入足厥陰經其主惡毒風毒

者凡毒必因熱而發熱甚則生風而榮血受傷毒乃生焉此藥鹹能入血寒能除熱則毒自消矣弘景以之傅金瘡止血止痛者亦取此意耳宜與番降真香同為極細末傅金瘡良

烏桕木根皮味苦微溫有毒主暴水癥結積聚

疏○烏桕木根皮稟火金之氣以生本經味苦氣微溫日華子言涼然詳其用應是辛苦溫之藥而其性則有毒也與巴豆牽牛大畧相似性沈而降陽中陰

也入手足陽明經其主暴水癥結積聚者皆二經為
病若能泄辛能散溫能通行腸胃則諸證無不除矣

主治參互

肘後方二便闕格二三日則殺人烏桕東南根白皮
乾為末熱水服二錢

簡誤

水腫多屬脾虛不能制水以致水氣泛濫法當補脾
實土為急此藥必不可輕用如果元氣壯實者亦須

暫施一二劑病已即去之

杉材微溫無毒主療漆瘡

疏○杉材得陽氣而兼金化本經氣微溫無毒日華子加辛氣味芬芳可升可降陽也入足陽明經本經主療漆瘡及蘇恭療腳氣腫滿者皆從外治取其芬芳能解漆氣之穢惡辛溫能散濕毒之衝逆也蘇恭又云服之治心腹脹痛去惡氣日華子云治霍亂上氣無非假其下氣散邪辛溫開發之功耳木皮主金

瘡血出及湯火傷灼取老樹皮燒存性研傅之或入雞子清調敷一二日愈香油亦可

主治參互

同橘皮木瓜香薷砂仁白菡豆石斛治暑月霍亂轉筋 柳柳州纂救死三方云元和十年二月得脚氣夜半寤絕脇有塊大如石且死因不知人三日家人號哭榮陽陳洵美傳杉木湯服半食頃大下三行氣通塊散方用杉木節一大升橘葉切一大升無葉則

以皮代之檳榔七枚童子小便三大升共煮一大升
半分為兩服若一服得快即停後服此乃死病會有
教者乃得不死恐人不幸病此故傳之 危氏得効
方小兒陰腫赤痛日夜啼叫數日退皮愈而復作用
老杉木燒灰入膩粉清油調傅効 救急方臙瘡黑
爛多年老杉木節燒灰麻油調隔箬葉攤貼紫定數
易即愈 除轉筋脚氣外用甚稀故不著簡誤
接骨木味甘苦平無毒主折傷續筋骨除風癢齧齒可

作浴湯

疏○接骨木稟土氣以生故其味甘苦氣平無毒甘能入脾養血故主折傷續筋骨苦涼能除風濕浮熱故主風癢齟齒也千金方打傷瘀血及產婦惡血一切血不行或行不止並煮汁服

主治參互

易簡方治折傷筋骨接骨木半兩乳香半錢芍藥當歸川芎自然銅各一兩為末化黃蠟四兩投藥攪勻

衆手丸如芡實大若止損傷酒化一丸若碎折筋骨
先用此敷貼乃服無別用故不著簡誤

樺木皮味苦平無毒主諸黃疸濃煮汁飲之良

疏○樺木皮生於西北陰寒之地故其味苦氣平無
毒氣味俱薄降多升少陰也入足陽明經五疸皆濕熱
鬱於陽明所致苦平能除溼熱故主諸疸也藏器以
之治傷寒時行熱毒瘡宗奭以之治肺風毒皆取其
苦涼能散風邪熱毒之義耳

主治參互

靈苑方乳癰初發腫痛結硬欲破一服即瘥以北來
真樺皮燒存性研無灰酒服方寸匕即臥覺即瘥也
唐瑤經驗方乳癰腐爛靴內年久樺皮燒灰酒服
一錢日一服 和劑局方肺風毒瘡遍身瘡疥如癩
及癰癬瘙癢面上風刺婦人粉刺並用樺皮散主之
樺皮燒灰四兩枳殼去穰燒四兩荆芥穗二兩炙甘
草一兩各為末杏仁水煮過去皮尖二兩研如泥研

勻每服二錢食後溫酒調下瘡疥甚者日三服

簡誤

脾胃弱易於作泄者忌之

木鼈子味甘溫無毒主折傷消結腫惡瘡生肌止腰痛
除粉刺黥婦人乳癰肛門腫痛

疏○木鼈子稟火土之氣感長夏暑熱之令以生故
其味甘氣溫無毒味厚於氣可升可降陽也為散血
熱除癰毒之要藥夫結腫惡瘡粉刺黥婦人乳門腫痛

婦人乳癰等證皆血熱所致折傷則血亦瘀而發熱
甘溫能通行經絡則血熱散血熱散則諸證無不瘳
矣其止腰痛者蓋指濕熱客於下部所致而非腎虛
為病之比也用者詳之

主治參互

孫用和秘寶方肛門痔痛用木鼈仁三枚砂盆搗如
泥入百沸湯一盃乘溫先熏後洗日用三次仍塗少
許 聖惠方耳卒熱腫木鼈子仁一兩赤小豆大黃

各半兩為末每以少許生油調塗之

簡誤

木鼈子味雖甘而氣則大溫本經雖云無毒然亦未免有毒但宜外用勿輕內服劉績霏雪錄云木鼈子有毒不可食昔薊門有人生二子恣食成痞其父得一方以木鼈子煮猪肉食之其幼子當夜死長子明日死其為毒雖未如此之厲然亦必非純粹之物也番木鼈形小於木鼈而色白味苦氣寒性無毒主傷

寒熱病咽喉痺痛消痞塊並含之嚥汁醫方摘要治
喉痺作痛用番木鱉青木香山豆根等分為末吹之

簡誤

番木鱉性大寒味至苦凡病人氣血虛弱脾胃不實
者慎勿用之

鈎藤微寒無毒主小兒寒熱十二驚癇

疏○鈎藤稟春氣以生本經氣微寒無毒保昇言苦
甄權言甘平應是甘苦俱不甚氣味悉和平者也為

手少陰足厥陰經要藥少陰主火厥陰主風風火相搏則為寒熱驚癇此藥氣味甘寒直走二經則風靜火息而肝心寧寒熱驚癇自除矣甄權主小兒驚啼瘈瘲熱壅客忤胎風者亦此意耳

主治參互

得遠志茯苓神琥珀棗仁丹砂牛黃天竺黃犀角屑生地黃龍齒麥門冬金箔治小兒驚癇瘈瘲有痰加竹瀝南星橘紅 聖濟錄小兒驚熱鈎藤一兩滑石半

兩炙甘草二錢五分為散每服半錢溫水服日三服
聖惠方卒得癩疾鈎藤炙甘草各二錢水五合煎
二合每服棗許日五夜三 除小兒驚癩外無他用
故不著簡誤

赤檉木無毒主剝驢馬血入肉毒取以火炙熨之亦可
煮汁浸之

疏○赤檉木稟春陽之氣以生故其色青而葉稍帶
微赤凌冬不凋其味甘鹹其氣溫而無毒浮而升陽

也入足陽明手太陰少陰經觀本經載其能解驢馬
血入肉發毒者蓋以驢馬性熱故多毒生時汗氣沾
人即能為病所以剝時熱血入肉亦能致毒此藥味
甘鹹甘得土氣鹹得水氣故能入血解血分之毒也
近世又以治痧癘熱毒不能出用為發散之神藥經
曰少陰所至為瘍癰正劉守真所謂諸痛癢瘡瘍皆
屬心火之旨也蓋熱毒熾於肺胃則發斑癍於肌肉
間以肺主皮毛胃主肌肉也此藥正入肺胃心三經

三經毒解則邪透肌膚而內熱自消此皆開發升散
甘鹹微溫之功用也

主治參互

同石膏知母薄荷荆芥玄參牛蒡子麥門冬竹葉連
翹黃芩甘草之屬治痲癩發不出或雖發不透如熱
甚毒熾舌生芒刺大渴謔語痲色紫黑者加入三黃
石膏湯內大効 單用及兼各藥並主痧癩首尾諸
證 治一切風不問遠近用赤檉木葉半斤切荆芥

半斤水五升煮二升澄清入白蜜五合竹瀝五合新
瓶盛之油紙封入重湯煮一伏時每服一小盞日三
服 酒多致病長壽仙人柳曬乾為末每服一錢溫
酒下 氣味甘溫性復無毒除痧癘外用甚稀故
不著簡誤

水楊葉嫩枝味苦平無毒主久痢赤白搗和水絞取汁
服一升日二大効

疏○水楊葉嫩枝生於涯涘之旁得水土之陰氣偏

多故味苦氣平無毒久痢赤白腸胃濕熱也得苦涼之氣則濕熱散痢自止今人又用以治癰腫痘瘡多効魏直博愛心鑑云痘瘡數日陷頂漿滯不行或風寒所阻者宜用水楊枝葉無葉用枝五斤流水一大釜煎湯溫浴之如冷漆湯良久照見纍起有暈絲者漿行也如不滿再浴之力弱者只洗頭面手足如屢浴不起者氣血敗矣不可再浴始出及痒塌者皆不可浴痘不行漿乃氣滯血滯腠理閉密或風寒外阻

而然浴令暖氣透達和暢鬱蒸氣血通徹每隨暖氣而發行漿貫滿功非淺也若內服助氣血藥藉此升之其效更速直見一嫗在村中用此有驗叩得其方行之百發百中慎勿易之誠有變理之妙也

柞木皮味苦平無毒治黃疸病皮燒末服方寸匕

疏○柞木即鑿子木處處山中有之葉小而細齒光滑而韌其木及葉了皆有針刺經冬不凋五月開碎白花不結子木心裏皆白色本經味苦氣平無毒

然其性又善下達主黃疸病者蓋黃疸因濕熱鬱於腸胃而發此藥若能燥濕微寒能除熱兼得下走利竅之性則濕熱皆從小便出而黃自退矣今世又以為治難產催生之要藥亦取其下達利竅之性耳同魚膘人參千里馬百草霜牛膝白芷當歸益母草為催生聖藥無別用故不著參互及簡誤

櫻櫚皮平無毒止鼻洪吐血破癥治崩中帶下腸風赤白痢入藥燒灰用不可絕過

疏○椶櫚皮稟微陽之氣以生故其味苦瀋氣平無
毒本經主諸病皆燒灰用者凡血得熱則行得黑灰
則止故主鼻洪吐血苦能瀉熱瀋可去脫故主崩中
帶下及腸風赤白痢也且血固脫之性而能消瘀血
故能破癥也凡失血過多內無瘀滯者用之切當與
亂髮灰同入更良如暴得吐血瘀滯方動暴得崩中
惡露未竭濕熱下痢初發腸風帶下方熾悉不宜遽
用即用亦無効入藥須年久敗者良

木槿平無毒止腸風瀉血又止痢後熱渴作飲服之令人得睡入藥炒用

疏○木槿本經氣平無毒詳其主治應是味苦氣寒清熱滑利之藥腸風瀉血濕熱留中也痢後作渴餘熱在經津液不足也夜臥少睡心經蘊熱虛煩不寧也苦寒能除諸熱滑利能導積滯故主如上等證今人用治癰瘡多取川中所產肉厚而色紅者彌良花功用相同作湯代茶煎能治風

主治參互

扶壽方牛皮癬川槿皮一兩大風子肉十五箇半夏
五錢剉河水井水各一盞浸六七宿入輕粉一錢禿
筆掃塗覆以青衣數日有臭涎出妙忌澡浴 簡便
方癬瘡有蟲川槿皮煎入肥皂浸水頻頻擦之或以
槿皮浸汁磨雄黃尤妙

神農本草經疏卷十四

欽定四庫全書

神農本草經疏卷十五

明 繆希雍 撰

人部

總二十五種今疏其要者十一種又陳藏器三種

髮髮

亂髮

人乳汁

頭垢

人牙齒

人尿

人中黃附

人溺

秋石附

溺白逆

婦人月水

經衣

附

浣禪汁

婦人禪
襦附

懷妊婦人爪甲

天靈蓋

人胞

胞衣
水附

初生臍帶

髮髮味苦溫小寒無毒主五癢關格不通利小便水道

療小兒癩大人瘰仍自還神化合雞子黃煎之消為水

療小兒驚熱

雷斅云是男子二十已來無疾患顏色紅
白於頂心剪下者入丸藥膏中用先以苦

參水浸一宿漉出入瓶
子以火煨赤放冷研用

疏○髮者血之餘也經曰男子八歲腎氣盛齒更髮

長是髮因人之血氣以為生長榮枯也故血盛之人則髮潤而黑血枯之人則髮燥而黃本經用髮髮之意為是故爾其味苦氣溫別錄小寒無毒入手足少陰經大人瘦小兒驚癇皆心肝二經血虛而有熱也髮為血之餘故能入心入肝益血微寒而苦又能泄熱所以療小兒驚癇及大人瘦也心與小腸為表裏腎與膀胱為表裏心腎有熱則二腑亦受病此藥能入心除熱入腎益陰則水道利五癥闕格俱通矣是

以古人治驚多用茯苓琥珀竹葉之類取其分利心
經之熱自小腸出也日華子主止血悶血暈金瘡傷
風及煎膏長肉消瘀血者悉取其入心走肝益血除
熱之功耳自還神化之事未見別方大抵以火煨之
復化而凝成血質此即自還神化之謂是因血而生
復還為血非神化而何

亂髮微溫主欬逆五淋大小便不通小兒驚癇止血
鼻衄燒之吹內立已

疏○亂髮即常人頭上墮下者其氣味所主與髮髮相似第其力稍不及耳以髮髮一時難得故別錄重出此條以便臨時取用療體實不甚相遠也

主治參互

和劑局方腸風黑散治腸風瀉血用亂髮一兩半荆芥二兩槐花槐角各一兩以上共煨為末枳殼甘草各一兩半為末和前末勻每服二錢水一盞煎七分空心服溫酒調下亦得 劉禹錫傳信方孩子熱瘡

亂髮一團如梨子大雞子黃十箇煮熟同於銚子內
熬至甚乾始有液出旋置盞中液盡為度用敷瘡上
外即以苦參粉摻之神効 又方小兒斷臍即用清
油調髮灰傅之不可傷水臍濕不乾亦傅之効 干
金方小兒驚啼亂油髮燒研乳汁或酒服少許良
聖惠方鼻血不止血髮燒灰吹之 又方諸竅出血
頭髮敗機陳蓮蓬並燒灰等分每服三錢童便溫酒
調下 婦人良方女人漏血亂髮洗淨燒研空心溫

酒服一錢 入諸膏藥內能消毒止痛長肉生肌
肘後方女勞黃疸膏髮煎用猪膏半斤亂髮雞子大
三團和煎髮消藥成矣分再服病從小便中出也

簡誤

髮灰走血分而帶散其主諸血證亦是血見灰則止
取其治標之義居多若欲全仗其補益未必能也經
熬燉成末後氣味不佳胃弱者勿服入外科藥殊有

神効

人乳汁主補五藏令人肥白悅澤

唐本注療目赤痛多淚解獨肝牛肉毒合

政濃汁飲之神効

疏○人乳乃陰血所化生於脾胃攝於衝任未受孕則下為月水既受孕則留而養胎已產則赤變為白上為乳汁此造化玄微之妙人身轉運之神也其味甘氣平無毒入心入腎入脾潤肺益壽延年之聖藥也氣血之液故能補五臟五臟得補則氣血充實而體自肥白悅澤也經曰目得血而能視乳為血化故

能療目赤痛多淚甘能解毒故又主解獨肝牛肉毒也

主治參互

攝生衆妙方接命丹治男婦氣血衰弱痰火上升虛損之證又治中風癱瘓手足疼痛不能動履等證用人乳二盃香甜白者為佳以好梨汁一盃和勻銀石器內頓滾每日五更一服能消痰補虛生血延壽此以人補人之妙法也 聖惠方眼熱赤腫人乳半合

古文錢十文銅器中磨令變色稀稠成煎瓶收日點
數次或以乳浸黃連蒸熱洗之 萬氏家抄方一切
虛損勞證太乙神應丸人乳一碗磁器煮乾焙燥牛
乳一碗同前製杜仲三兩破故紙二兩半白蘚皮白
茯苓牛膝當歸各二兩黍米金丹一箇曬乾即初生
兒口中血珠共為末蜜丸桐子大每服一九夜間噙
化

簡誤

乳屬陰其性涼而滋潤血虛有熱燥渴枯涸者宜之
若臟氣虛寒滑泄不禁及胃弱不思食脾虛不磨食
並不宜服

頭垢主淋閉不通

梳上者名
百齒霜

疏○頭垢頭上垢膩也其性滑潤而下走故本經主
淋閉不通及弘景療噎疾其味苦溫能走陽明故又
主勞復及婦人吹乳也

主治參互

同白芷貝母半夏為丸酒下治婦人吹乳 同山茨

菰橘葉鼠糞人爪蒲公英柴胡山豆根白芷連翹貝

母夏枯草忍冬藤治乳岩乳癰神效 類要方天行

熱病後勞復含頭垢棗核大一枚良 外臺秘要預

防勞復傷寒初愈欲令不勞復者頭垢燒研水丸梧

子大飲服一丸 衛生寶鑑婦人吹乳百齒霜以無

根水丸梧子大每服三丸 數條之外無別用故不

著簡誤

人牙齒平除勞治瘡盡毒氣入藥燒用

疏○牙齒者腎之標骨之餘也經云男子三八腎氣平而真牙生五八腎氣衰而齒槁以腎主骨故也其味甘鹹氣熱有小毒其主除勞治瘡者蓋勞乃勞極精氣之絕腎家虧損所致也齒牙為腎氣所生以類相從適還其本故主之也瘡亦因勞而發非夏傷暑秋為瘡之比故亦主之味甘而鹹所以能解盡毒氣也今世又以之治痘瘡倒靨乳癰未潰為必須之藥

主治參互

錢氏小兒方痘瘡倒靨人牙燒存性入麝香少許溫酒服半錢 聞人規痘疹論人牙散治痘瘡方出為風寒外襲或變黑或青紫此倒靨也宜溫肌發散使熱氣復行而斑自出用人牙不拘多少瓦罐固濟煨過出火毒研末出不快而黑陷者獺猪血調下一錢因誤服涼藥血瀋倒陷者入麝香溫酒服之其効如神 肘後方乳癰未潰人牙齒燒研酥調敷之 直

指方陰疽不發頭凹沈黯不疼無熱內服補散不起
用人牙燒過穿山甲炙各一分為末分作二服用當
歸麻黃煎湯下外以薑汁和麩傅之

簡誤

近世用人牙治痘瘡陷伏稱為神品然一槩用之貽
害不淺夫齒者腎之標骨之餘也痘瘡則毒自腎出
方長之際外為風寒穢氣所冒腠理閉塞血滯不行
毒不能出或變黑倒靨宜用此以酒麩達之竄入腎

經發出毒氣使熱令復行而瘡自紅活蓋劫劑也若
伏毒在心昏冒不省人事及氣虛色白痺塌不能作
膿熱沸紫泡之證止宜解毒補虛苟誤用此則鬱悶
聲啞反成不治之證可不慎哉其除勞治瘡本經雖
言之今世亦稀用

人尿寒主療時行大熱狂走解諸毒宜用絕乾者搗末
沸湯沃服之

疏○人之五穀入胃津液上升為氣血糟粕下降而

成糞其本原以化過但存極苦大寒之氣味耳入足
陽明經經曰陽明實熱則登高而歌棄衣而走苦寒
能除陽明之熱故療時行大熱狂走也凡毒必熱必
辛苦寒能除辛熱故又主解諸毒也蘇恭云新者封
疔腫一日根爛蓋疔腫乃風火之毒氣結成得大寒
極苦之氣則風火散根自爛也今世人又以之治痘
瘡血熱紫黑倒靨者殊効

糞清臘月截淡竹去青皮塞口納糞坑中積年得汁

甚黑而苦主天行熱狂熱疾中惡蕈毒惡瘡瘟病垂死者皆瘥一名黃龍湯俗名金汁

人中黃即多年廁坑中執上所凝結黃逆是也藥性治療大約與人屎同解胃家熱毒有效

主治參互

斗門方熱病發狂奔走似癲如見鬼神久不得汗及不知人事者以人中黃入大罐內以泥固濟煅半日去火毒研末新汲水服三錢未退再服 寇宗奭衍

義大熱狂渴乾陳人屎為末於陰地淨黃土中作五
六寸小坑將末三兩匙於坑中以新汲水調勻良久
澄清細細與飲即解 儒門事親四靈無價散治痘
瘡黑陷腹脹危篤者此為劫劑用人糞猫糞猪犬糞
等分臘月初旬收埋高燥黃土窖內至春取出砂罐
盛之鹽泥固濟炭火煨令烟盡為度取出為末入麝
香少許研勻甕器密封收之一歲一字二歲半錢三
歲一錢蜜水調下須臾瘡起 千金方疔腫初起刮

破以熱尿傅之乾即易 又方五色丹毒黃龍湯飲
二合并塗之良 陶弘景解藥箭毒交廣夷人用焦
銅為箭鏃更以毒藥物汁漬之射人纔傷皮便死惟
飲糞汁即解

簡誤

傷寒溫疫非陽明實熱者不宜用痘瘡非火熱鬱滯
因而紫黑乾陷倒靨者不宜用以其苦寒之極耳
人溺療寒熱頭疼溫氣童男者尤良

疏○人溺乃津液之濁者滲入膀胱而出其味鹹氣
寒無毒為除勞熱骨蒸咳嗽吐血及婦人產後血暈
悶絕之聖藥晉褚澄勞極論云降火甚速降血甚神
飲洩溺百不一死服涼藥百不一生言其功力之優
勝也經云飲入於胃游溢精氣上輸於脾脾氣散精
上歸於肺通調水道下輸膀胱故人服小便入胃亦
隨脾之氣上歸於肺下通水道而入膀胱乃循其舊
路也故能治肺病引火下行凡人精氣清者為血濁

者為氣濁之清者為津液清之濁者為小便與血同類也故其味鹹而走血鹹寒能伏虛熱使火不上炎而血不妄溢是以能療諸血證也蘇恭主久嗽上氣失聲及日華子止勞渴潤心肺療血悶熱狂撲損瘀血在內暈絕止吐血鼻衄皮膚皴裂難產胞衣不下諸證悉由此故本經主寒熱頭疼溫氣者鹹寒能除邪熱故耳法當熱飲熱則於中尚有真氣在其行自速冷則惟存鹹味寒性矣

主治參互

同枇杷葉天門冬麥門冬蘇子桑白皮沙參五味子
生地黄款冬花百部治陰虛咳嗽聲啞喉間血腥氣
同蘇木番降香續斷牛膝牡丹皮蒲黃治內傷吐
血或瘀血停留作痛 同澤蘭荆芥白芷續斷延胡
索牛膝蘇木黑豆治產後血暈虛者加人參 凡產
後溫飲一盃可免血暈至三日後止之 中暈昏倒
以熱小便灌下即活 聖濟總錄頭痛至極童便一

盞豉心半合同煎至五分溫服 孟詵必效方骨蒸
發熱童便五升煎取一升以蜜三匙和之每服二碗
半日更服此後常服自己小便輕者二十日重者五
十日瘥 聖惠方絞腸沙痛童便乘熱服之即瘥
仲景方中暑昏悶夏月在途中熱死急移陰處就掬
道上熱土擁臍上作窩令人溺滿煖氣透臍即甦乃
服地漿蒜水等藥 千金方金瘡出血不止飲人尿
五升 外科發揮折傷跌撲童便入少酒飲之推陳

致新其功甚大 千金方火燒悶絕不省人事者新
尿頓服二三升良 通變要法人咬手指瓶盛熱尿
浸一宿即愈 普濟方赤眼腫痛自己小便乘熱抹
洗即閉目少頃此以鹹寒內有真氣故能退去邪熱
也

簡誤

人溺滋陰降火除骨蒸解勞乏治諸吐衄咯血唾血
其効甚速褚澄遺書云人喉有竅則咳血殺人喉不

停物毫髮芥帶必效血既滲入愈滲則愈效愈效愈
滲惟飲溲溺則百不一死若服寒涼則百不一生其
為肺腎有火者必須之物第其性稍寒惟不利於脾
胃虛寒或溇泄及陽虛無火食不消者咸在所忌今
世人類用秋石此乃水澄火鍊真元之氣盡失其功
不逮童便多矣况難多服久服則鹹能走血使血凝
泣為病

溺白並療鼻衄湯火灼瘡

疏○溺白逆即人中白乃人溺之積氣結成其味鹹
氣涼無毒能瀉肝腎三焦膀胱有餘之火本經療鼻
衄及大明治傳屍勞熱肺痿心隔熱吐血羸瘦渴疾
者以其能入諸經瀉去火邪也涼能除熱故又治湯
火灼瘡今人以之治口舌生瘡疔蠱等證多効是其
除熱降火之驗也

主治參互

同水片硼砂青黛黃檗牙硝白礬治口舌生瘡及小

兒走馬牙疳口臭 經驗方鼻衄不止人中白焙乾
入麝香少許溫酒調服立効 又方小兒口疳人中
白煨黃檗蜜炙焦為末等分入冰片少許以青布拭
淨搽之累効

婦人月水解箭毒并女勞復

陳藏器云經衣主金瘡血湧出炙熱熨之又燒灰傳

虎狼傷瘡及箭鐵毒入腹

疏○經云女子二七天癸至任脈通太衝脈盛月事
以時下謂之天癸者乃天一所生之水也上應太陰

下應海潮月有盈虧潮有朝夕故月事一月一行與之相符也其味鹹鹹為水化凡毒得水則解故能解箭毒也女勞復者熱病新瘥後交感而得其證發熱煩躁少腹陰囊牽引而痛以前病餘熱未除陰精復損故有是證月水乃陰中有陽之物能補陰除熱故主之也金瘡及虎狼傷瘡皆血分受傷為病以類相從乃所以補其不足也童女首經名紅鉛能回垂絕之陽氣第一時難得耳如女子自受胎時算至十四

歲足即於是日是時經至者此為正鼎其經為上藥用法招攝於經將至時真氣先到采入身中名得大藥可以接命即首楞經所載精仙是也絕非入爐交感亦非情想得通故亦成仙道耳

主治參互

扁鵲方丈夫熱病後交接復發忽卵縮入腹腹痛欲死燒女人月經赤衣為末熱水服方寸七即定并治女勞色疸 千金方男子陰瘡因不忌月事行房陰

物潰爛用室女血衲瓦上燒存性研末麻油調傳
博物志交廣夷人以焦銅和毒藥於箭鏃上中人即
沸爛須臾骨壞而死但服月水尿汁解之

簡誤

月水雖能治病然穢污不潔之物故女子入月時人
宜遠之其昇丹煎膏治藥及小兒出痘切須避忌如
犯之則藥不靈痘變壞也紅鉛其性質乃陽氣凝結
而成火盛人不宜單服須多服人乳并入童溺乃佳

浣禪汁解箭毒并女勞復亦善 婦人禪襠主陰易病
當陰上割取燒末服方寸七童女禪益佳若女患陽易
即須男子禪也陰易病者人患時行病起後交合陰陽
便即相著甚於本病其候小便赤澇寒熱甚頭痛腰痛
耳鳴眼花服此便通利

疏○禪襠居下體得陰氣勝取其以類相從氣相感
能導邪熱故主陰陽易病也

主治參互

仲景方陰陽易病身體重少氣腹裏急或引陰中拘
急熱上衝胷頭重不欲舉眼中生花膝脛拘急者燒
禪散主之取中禪近陰處燒灰水服方寸七日三服
小便即利陰頭微腫則愈男用女女用男 千金方
胞衣不下以本婦禪覆井上即下

懷妊婦人爪甲取細末置目中去翳障

疏○爪者筋之餘肝膽之外候也經曰多食辛則筋
急而爪枯以辛能散真氣而走筋也本經獨用懷妊

婦人者蓋婦人氣血充實乃能受孕取其有生長力
緊之意也其味甘鹹氣平無毒目中醫障肝中血虛
也爪甲乃肝之餘氣所生而性又帶散故點目能去
醫障也寇宗奭以衆人甲刮取細末搐鼻內治鼻衄
立愈兼能催生利小便止尿血散乳癰等用

主治參互

聖惠方胞衣不下取本婦手足爪甲燒灰酒服 又
方一切目疾以木賊草擦取爪甲末同丹砂等分研

勻以露水搜九芥子大每以一粒點入目內或用乳
汁和亦得并治飛絲入目

天靈蓋味鹹平無毒主傳尸尸疰鬼氣伏連久瘴勞瘧
寒熱無時者燒令黑細研白飲和服亦合丸散用

疏○天靈蓋乃死人腦蓋骨也不用他骨而用此者
以人生時腦為諸陽之會而此骨則一身衆骨之主
也其主傳尸尸疰鬼氣伏連者取其同類之氣引出
邪魅則其魂魄飛越不復附人故得瘥也久瘴勞瘧

寒熱無時者亦邪惡之氣侵人也辟惡散邪是其能
事故亦主之

主治參互

同鬼白乾漆象膽獺肝丹砂胡黃連入滋陰藥內治
傳尸勞 同牛黃象牙末蛀竹屑血竭乳香沒藥黃
蠟明礬真珠作丸治楊梅結毒 痘瘡經驗方痘瘡
陷伏灰平不長此係虛寒證用天靈蓋燒研酒服三

分

附化屍場上人骨取為細末傅金瘡止血長肉及惡瘡不收斂并能治打撲折傷人受杖時服之不痛不腫不爛

簡誤

天靈蓋治勞瘵者以其有尸鬼勞蟲為害取其逐散邪也今人虛損勞怯皆係色欲過度損傷真陰實無鬼氣淹伏何得用此幽暗不祥之物治之哉其痘瘡虛寒陷伏或為邪氣所觸發不出者不過借其陽氣

所結之餘逐散其邪以發出耳非正治也若血熱煩躁瘡乾紫黑者用之必致危殆不救慎之慎之

人胞主血氣羸瘦婦人勞損面黧皮黑腹內諸病漸瘦瘁者以五味和之如鮓餌法與食之勿令知一名紫河車

疏○夫人有生之初攬父精母血以成胚胎外即有衣一層裹之即胞也至十月降生時隨兒後出其味甘鹹氣溫無毒血氣羸瘦婦人勞損面黧皮黑腹內

諸病漸瘦瘁者皆榮血不足精氣虧損也此藥得精
血之氣而結得從其類以補之是以主諸證也今世
以之治男女一切虛損勞極為益血補精氣之用

主治參互

同人參黃耆鹿茸白膠當歸補骨脂五味子巴戟天
治真陽虛極畏寒足冷 吳球大造丸治虛勞骨蒸
女人無子及多生女月水不調小產難產服之必主
有子危疾將絕者一二服可更活一二日其補氣血

之功力可見也久服耳目聰明鬚髮烏黑延年益壽
有奪造化之功故名大造丸用紫河車一具男用女
胎女用男胎初生者米泔洗淨淡酒蒸熟搗曬研末
敗龜板童便浸三日酥炙黃二兩黃檗杜仲各一兩
半牛膝一兩二錢生地黃二兩半入砂仁六錢白茯
苓二兩絹袋盛入瓦罐酒煮七次去茯苓砂仁不用
杵地黃為膏聽用天門冬麥門冬人參各一兩二錢
淨夏月加五味子七錢俱忌鐵器為細末地黃膏加

酒米糊丸小豆大每服八九十九空心鹽湯下女人
去龜板加當歸二兩男子遺精女人漏下並加牡蠣
粉一兩去人參

簡誤

人胞乃補陰陽兩虛之藥以其形質亦得男女坎離
之氣而成如陰陽兩虛者服之有反本還元之功誠
為要藥也然而陰虛精涸水不制火發為咳嗽吐血
骨蒸盜汗等證此屬陽盛陰虛法當壯水之主以制

陽光不宜服此並補之劑以耗將竭之陰也胃火齒痛法亦忌之

胞衣水味辛無毒主小兒丹毒諸熱毒發寒熱不歇狂言妄語頭上無辜髮豎虛痞等證天行熱病飲之立効此即胞衣埋地下久遠化為水者得地中之陰氣其氣必寒辛寒而走足陽明經故主如上諸證也南人以甘草升麻和入胞瓶盛埋之三五年後掘出取為藥也

初生臍帶主瘡燒為灰飲下之

疏○臍者命蒂也當心腎之中為真元歸宿之處胎在母腹臍連於胞喘息呼吸滋養之妙從此而通胎出母腹臍帶剪斷則一點真元之氣從此而歸入命門丹田故臍為命蒂而臍帶亦真氣會聚之所也本經以之治瘡者應是久瘡虛寒之甚藉其氣以補不足也今世以小兒脫下臍帶燒灰與服可解胎中一切毒及免驚風痘患亦取裨補真元耳

主治參互

全幼心鑑臍汁不乾綿裏落下臍帶燒研一錢入當
歸頭末一錢麝香一字摻之 保幼大全預解胎毒
臍帶燒灰以乳汁調服或入辰砂少許可免痘患無
毒而主療甚稀不著簡誤

神農本草經疏卷十五